

【鐵甲武士——雞油蛄¹】邱鴻春原作

熱天來咧！六月中開始，有兜公園抑係山林步道，打早出來運動个人，下把仔會聽著佢兜講，有看著雞油蛄也。可能盡多人毋知麼个係雞油蛄，就係國語講个「獨角仙」啦！

伯公岡个萬善爺廟，盡難得廟方有心，慢慢仔向等公園化來經營。在廟坪面前側賺，做一隻雞油蛄个生態教育園區，種咧盡多頭个白雞油樹。經過三年个照顧，樹仔總算大頭起來也，雞油蛄个復育也盡成功。

今年七月份會第一擺開辦，雞油蛄生態教育，結合在地小農个大型活動。期待活動鬧棚圓滿，做得定定仔帶動地方个發展，甚至變成在地个文化特色景點。這係避暑期間最好个遶寮位所，不管係撈阿爸、阿姆共下駛車仔來，抑係坐火車來都盡利便。毋過愛提醒一下，最好在朝晨八點半前到來，越早會看著越多，越晝斯越少，因為雞油蛄也驚熱，會囡起來睡目哦！

可能有人會問，雞油蛄係麼个變个？其實佢就係雞嫲蟲變个。又有人會問，仰會安到「雞嫲蟲」恁生趣个名仔？因為雞嫲

蟲當肥、當大隻，專門囡在地泥下；頭擺莊下人大部分有畜雞仔，雞嫲會渡等雞子在樹園肚，用腳緊蹶尋食，這係雞嫲最好食也最有肉个點心，正會分人安到雞嫲蟲。

雞油蛄出世，主要係愛傳代下去，野生个壽命，差毋多有個半月到兩隻月左右，若係人畜个，可能就一隻月定定。野生个，最好食个，就係白雞油樹个樹仔乳²；人畜个，做得分佢食西瓜撈黃梨。公个在頭那頂有生一隻長角，係用來相打、爭地盤、爭舖娘用个，做得撈對方撬起來拂出去，非常砸哦！嫲个無生角，撈公个一比就知，盡好認，係挖泥囡空个高手。除忒逐日，日時頭囡泥空歇睏以外，最重要个係，愛生卵該時，會尋一隻最營養、最秘密个位所生卵。等細雞嫲蟲出咧，正有東西好食，又毋會有其他个危險、毋會分雞嫲來食忒。

故所下二擺，你撈阿姆抑係阿婆在菜園肚改菜園，係有看著雞嫲蟲，愛遽遽撈佢奔泥轉去，正毋會害佢分鳥仔食忒，分佢做得平安快樂大，變做靚靚又英勇个鐵甲武士——雞油蛄哦！

¹ 雞油蛄：音 gie' iu' gu'；獨角仙，又稱為雙叉犀金龜。

² 樹仔乳：音 su e' nen；樹的汁液。